

孫蘭甫縣長贈庚午四月念六日也

傭識

珠河縣志

己巳九月

卷一

王步公署

印

珠

河

圖

川

志

己巳秋九月

潘

蘇工業學院圖書館章

潘志河署



珠河縣志序

鄭漁仲嘗謂古之學者索象於圖索理於書故人易爲學亦易爲功而蕭何得秦圖書以具知天下之要所謂圖者山川險易星土分合之圖也書者貢賦多寡九等之書也自有方志之書郡縣之政俗形勢益燦焉具備吉省昔爲根本重地封禁固守迨俄人經營中東鐵路翻然覺悟改置行省於是一變而爲遠東門戶然沿路線各地多草萊未闢近年始擇要添設縣治珠河縣其一也考珠河舊名烏吉密羣山四拱沃野平鋪往時伏莽之奸踞爲巢窟剿捕之法有時不得行牧畜耕稼之利不聞金錫絲枲之饒不與惟地居扼要爲東路咽喉頻年擘畫經營規模畧具雖百堵猶未盡興而廨署倉獄賓邸黌舍次第建置道塗輟結帆轡櫛比民歌樂裕富庶可期茲縣令孫君列其疆域考其沿革本其物用綜其措施成珠河縣志若干卷披圖啟籙漸有可觀邇者邊境風雲變

幻莫測東北情勢益爲留心邊事者所注重然必周知吉省之情勢而後可以
論東北之情勢必周知各隅之情勢而後可以論吉省之情勢是編之書不僅
爲采風之考證有以知形束壤制之端安內攘外之要於邊務國防有裨益焉
是爲序

中華民國十八年十月吉林省政府主席張作相序

經國緯志

珠河縣志序

珠河於古無徵因境內有大亮珠河遂以名焉舊屬同賓轄境入民國後始設縣治山高土厚物產豐饒墾民多樂趣之然林麓叢深萑苻宵小亦往往伏匿於其間令茲土者每以鷹鷂搏擊爲能而於文化弗加之意是何昧其本而齊其末耶近歲國家功令凡曩無志書各縣督令從事編輯藉明敷教播治之由意至善也夫疆域之沿革風俗之淳漓物產之盈虧民生之消長掎撫掇拾彙爲一編皆文化之所著固不必名宦寓公執文科第聲名文物博引旁徵始足以宏我地望垂諸奕葉也此志肇始於民國十七年四月告成於民國十八年十月歷時未久而敘述秩然擷其要旨輟其浮華俾施政者恍然而知所措邑令孫君之功可爲鉅矣因述脩志之概要以爲他邑之未成書者告

民國十八年十月武進潘鶚年

珠河縣志序

昔吾宗實齋先生有州縣請立志科之議謂六科之外州縣紀載並無專人典守大義闕如有好事者流修輯志乘率憑一時采訪人多庸猥例罕完善甚至挾私誣罔賄賂行文是以言及方志薦紳先生每難言之蓋天下大計既始於州縣則史事責成亦當始於州縣之志蓋以登載有一定之法典守有一定之人故州縣之志不可取辦於一時平日當特立志科僉典吏之明於文法者以充其選而且立爲成法俾如法以紀載略如案牘之有公式則無妄作聰明之弊積數十年之久則訪能文學而通史裁者筆削成書又積而又修之於是不勞而功效已爲文史之儒所不能及旨哉言乎所謂貫串史學洞達治本者矣頃珠河縣縣長孫君蘭甫以新輯珠河縣志稿二十卷來屬爲弁言珠河故地在漢爲挹婁國在唐爲勃利州在遼爲女真本部在金爲胡里改在明爲努兒

于在清爲甯古塔轄境至光緒間始設長壽縣巡檢民國五年更名同賓十一年改爲烏珠河設治局十六年始改今縣夫設縣不及三年而縣志已裒然成帙况僻在邊塞文獻無徵百堵皆興日不暇給如孫君者寧非好整以暇及披覽志稿則與實齋所議頗多吻合卽如與掾屬金檀孫諸君商榷各任分纂及調查非所謂特立志科僉典吏以充其選乎聘宋君爲總纂非所謂訪能文學而通史裁者筆削以爲成書乎縣爲新設志屬初創雖不免於僻陋而憑一時之采訪挾私誣罔之弊則可信其必無夏造殷因各有所蔽而天造草昧固較改絃更張易於爲力斯志草創假以歲月討論潤色他日重修必有一日千里之勢至實齋之意欲於縣署特立志科以爲平日錄副本藏圖籍之用誠爲要圖惜形格勢禁非今日所可躋及爲縣長者果能心通其意與邑中賢士大夫砥厲琢磨稽志改善一舉一動必求其足以奮直筆而入國史藁爾彈丸固無

人敢於藐視也抑更有進者縣志之文野以縣政之進化與否爲衡今日者省政府新造與珠河縣新設俱爲一蕢之覆余承乏民廳與孫君之令珠河若網在綱如驂之靳自今以往凡所以勵精圖治爲將來志乘增進地位者匪異人任願與孫君共勉之

中華民國十八年十一月玉山章啓槐

珠河縣志序

吉省哈綏路綫珠河其要衝也舊屬於同賓南境五常北境自同五官荒處開放招墾土地逐漸擴張偏隅初盡荏符隴畝且滋紛糾嗣經 王省長維宙准人民代表朱星五等之請於壬戌夏在珠河鎮設局治事瀋陽李君春榮首任設治員創辦年餘規模粗具歲甲子閏侯林君珪繼任辦理未久乙丑冬遂易撫順孫君荃芳治之孫君力任其難興利除弊於其間蒸蒸然將近五載予自癸亥春奉省命調吉清鄉按限周巡蒞珠境凡四次標本兼治端賴

軍民政長

官對於軍警團隊嚴厲督責協助暨地方賢良吏籌治有方斯邑得以又安學警商農相率振興種種成績固不可不傳之紀載今孫君奉署理之令因珠河改縣後一切建設告成以監纂縣志乞予作序予何辭哉古者列國皆有史史所紀錄謂之志周官小史掌邦國之志蓋卽後世郡縣志所由昉矣取郡縣志

而薈萃之則有省志取省志而薈萃之則有一統志是縣志之修尤亟亟而不容稍緩然非自別於流俗敦崇實際視爲急務者亦不能挈然而有當凡省轄四十二縣大半成有志書每值輪蹄所過之區往往究其輿地物產風俗宗教金石形勝諸端有志則校勘無志則追考惟於珠河一邑屢就公便周覽時以紀載缺如爲憾乃孫君荃芳簿書之暇與邑之士紳宋景文等潛心於境內諸所應記之事實雖乏長老取證而網羅墜簡檢拾舊聞甫將成編考厥囊貫古今粲然具備成一邑之典則用心致力可謂誠且勤矣西接阿城南連五常北毗同賓新治之善政善教較諸舊治殊不少遜至東隣葦河設治同時改縣亦同時而地勢略異望彼殷殷求治者相繼而媲美焉是爲序

中華民國十八年己巳安徽歙縣曹祖培撰

珠河縣志序

民國十四年乙丑冬十月余捧檄宰斯邑尙在設治期間名爲烏珠河設治局

歷經瀋陽李君

紫陽

閻侯林君

伯桓

兩任經營蓋設治已三年矣規畫雖具縣

治未成始至之日值軍興未已盜賊滿野戢軍弭盜日不暇給斯邑素號匪區他務未遑以保治安爲急購械自衛又款無所出無已請於護路軍總司令部假以械彈亟整團隊民賴以安自是商農畱集設肆墾荒地漸繁盛十五年秋清鄉總辦曹公巡方蒞其境歎爲地面發達有一日千里之勢非改縣治不足以圖進展電請省府交道核議蒙道憲蔡公力陳設治成績實有改縣之必要覆蒙照准於十六年五月奉令援勃利成案改爲三等縣缺命名曰珠河仍委基芳知縣事而警學農商實業交通次第興舉縣署因而建築民乃大和猥以珠邑爲新造之邦欲其地理歷史政教風俗久而不湮非有紀載不足以

供查考免散逸歲斯紀載非縣志不爲功奈草萊初闢文獻無徵擬修縣志夫豈易易迺與科長金君嘯宇財務處主任檀君荷清荒務監察員孫君貫一公餘商榷僉云欲興斯役首在得人詢諮延訪得宋君博庵積學者宿由龍江治荒來此聘爲總纂尤君玉書沙君滋圖溫君樹毅及金檀孫三君共膺分纂復聘縣農會長李君洞塵商會長郭君子明教育局長高君嵩齡士紳王君毓峯等十餘人膺調查于役諸君對珠河設治均身經其事歷其時處其地各方宿儒萃聚於斯人才旣得事益難緩十七年春請准 省憲由地方自治款動用二千五百元不得溢支提倡督飭不稍寬假而諸君者以事屬正辦義不容辭纔枵腹亦不惜奚計及款之多寡乎 荃芳 欽其熱誠踵事纂修今得歲事哀然卷帙煥乎成章荒僻之區遽而得此詎意料所及哉竊因之有感矣文化之興鬱之斯光聚之斯大珠河自金元以後燕沒空山寂然無聞積數百年之精華

自設治而始發軔其孟晉未可量也邑無土著戶盡流居四方才智之士接踵而來其灌輸知識溝通學問較故步自封之邑收效爲尤速況地當東鐵之衝交通便利物產豐富兼之山水明秀子弟聰穎發展前途甯有既極宰斯土者與當地共事諸紳如置縣志於不顧異日者輶軒問俗長吏觀風農牧傳聞失實父老語焉不詳有志之士無從考證未免山靈笑客人文鬱湮奚以對此佳山水良子弟斯志之修縱言之無文而事必有徵以待來者續修而潤色之此志可作嚆矢焉奚懼人之笑我拙耶書成謹誌其始末俾後之君子有所參考云爾是爲序

中華民國十八年歲次己巳九月知珠河縣事孫荃芳序於新建官廨

序

溯自金源時代上京會寧（卽阿城南之白城）爲金之舊土初視爲內地今之
珠河境原屬金上京路金製女真字增設女真國子學設諸路府學東北文化
曾以爲策源地因胡元崛起出師征金前後八次師行所至皆爲澈底殘毀金
源文獻遂爲之蕩然殆盡至明成祖底定東北征服韃靼海峽於此地設窩集
衛所置努兒干都司以統治之迄於明季各部酋長乘中原多事互爭霸權遂
爲滿洲所統一滿清又因迷信風水以其地爲愛新氏發祥重地土地林木悉
予封禁雖達官貴胄亦不敢輕議設官貽誤於開拓邊境殊非一世有清中葉
禁網稍開漸知邊遠有殖民之必要然設官分治率由政府自動人民尙無言
權民國告成完全弛禁農商各業稍具萌芽東鐵午貫全境地方文物日躋於
開明之域三五旅舍之荒村一二炊煙之墟里轉瞬之間棟宇櫛比加以鐵路

需要各種物質交通便利遠方人士雲集斯土從事招墾興言設治榛荒一變
爲畝畝迄於今日乃成爲閭閻相望商賈喧闐之鬧市焉癸亥四月烏珠河設
治局成立丁卯五月經設治員孫公呈准升縣並委孫公繼治署知縣事旋孫
公組設建築委員會闢街基籌款項興建縣署監獄警察所財務處教育局保
安馬步各隊各機關歷經年餘戊辰夏縣公署落成土地人民確敷縣治考成
知事孫公以此地風物山輝川媚將來發達無可限量思爲文以記之是以有
創修縣志之議議成以總纂一席囑_文夫志爲一縣史乘以譴陋如_文者司其
事得毋貽羞鉛槧乎公曰好在經過情形歷在目前卽其所知者言之徵實紀
事不必以文字工拙計也_文以地方分子勉爲其難茲者志書已成將付剞劂
爰是爲序以誌之

博庵宋景文序於縣志局

序

凡事守成易而創始難因其舊而增益之與當其新而創造之其力之勤惰未易侔而其成就之完備與否亦未易比並也縣志一書關於一縣之人物政治文藝物產疆域風俗等事至爲重要故欲觀一縣之文野豐嗇治忽卽其縣志而可以知之珠邑地居偏僻開發較晚以視其他各縣有文獻之足徵者初何敢相提並論顧自 蘭公縣長蒞任以來勵精圖治其所以建設啓發之者不遺餘力以故凡各縣之所有者此間亦皆有之而關於招徠農民生而聚之闢城建署以立根基爲事更勤以致漸呈豐裕之象而文化一事尤孳孳未已於是爰有縣志之作 蘭公總其成而以同人等分司其事筆路藍縷爲事頗難其所以搜集採輯之者倍感困難顧以一縣文化之所係 縣長之所督促不敢不勉爲其難用能集銖累寸輯成是志以爲採風問俗者之一助並爲後之

修斯志嚆矢至於採訪有所未周記載有所未備以創始困難之關係續斯志者或能有所見諒歟

中華民國十有八年重九日瀋陽王承烈拜序

序

王承烈